

靈巖山人詩集

靈巖山人詩集目錄

第三卷 古今體詩

硯山怡雲集

著雍執徐

小樓曉起

過穹窿道院

春日山居題壁

光福寺

客過

夜遊白雲寺看梅花

久不晤王子存素標春暮過訪山中以畫見貽

詩以酬之

紅蕉書館賦呈紫滄師

過傳是樓贈徐大桂門

德諒

春盡日同人橫塘泛舟分得窻字

登陽山

感秋九章

有序

重拜靜公影堂

有序

畫二首

聽雪閣

小憩寒山放鶴亭作

過黃丈野鴻

子雲

山居

微雲

秋郊

題馬和之十八應真卷後

上方寺

睡起

汲雲庵詠食物四首

風雨梅

碧蘿春

松花蕈

燕來筍

訪惠徵君定宇

棟

先生賦贈三首

書館夜讀聞隆福寺鐘聲

冬夜期友人不至

屠維大荒落

素心蘭十二韻

逸園梅花盛開酬主人程自山

鍾

何畹芳

蘭

陸錦雯

綱

早春過訪信宿山齋臨別

得句贈行二首

六浮閣

假山

題隱者村居

七十二峯閣觀雨作

感春

郊行

初夏卽事偶成

山中晚歸值雨作

獨酌

吉雲庵晚眺

書窻

題讀畫舫壁

劍門

拂水

吾谷

三峯

芙蓉莊紅豆樹歌

謁光祿卿沈敬亭

起元

先生於學易堂敬呈四

律

白蘋花

月夜歸山館憩道旁古墓

弇園詠芙蓉

村夜

歲暮過穹窿上清宮贈道士陸寒碧

神弦曲

靈巖山人詩集卷三

鎮洋畢沅秋帆

一字縷蘅

硯山怡雲集

著雍執徐

小樓曉起

傷春人似杜樊川  
隱几西樓思黯然  
風急紙窗關不住  
梅花片片落琴絃

過穹窿道院

討春遠過神仙宅  
石級盤空躡白雲  
松院鶴歸棋未散  
花壇月上磬初聞  
巡廊徧讀塵牆句  
剔蘚閒看石碣文  
尚有山陰劉道士  
乞書遺教餉鷺羣



春日山居題壁

遙山環向草堂青竹裏柴扉鎮日扃花徑泥香初下燕柳  
塘水煖欲生萍愁逢酒盡偏相薄夢入春來已不靈空憶  
勞勞遠行客馬蹄芳草短長亭

光福寺

虎山橋畔路月夜共僧行石磴落人影雲泉和磬聲梅繁  
香徑塞桐覆小窻清惠遠揮松柄談經破俗情

客過

剝啄叩雲門人來破蘚痕牆低花得氣砌壞竹行根作傳  
摹公穀論詩薄宋元欣然忘主客相對倒清尊

夜遊白雲寺看梅花

寺在雲深處花光照兩廡坐與老僧談竹鑑響春雨舉頭  
月正中疎影如畫譜我欲爲寫真從僧借豪楮寒禽忽飛  
來雙雙踏香語

久不晤王子存素懔春暮過訪山中以畫見貽詩  
以酬之

丹青能事敵鬼斧神妙欲爭化工補婁東王氏多畫師南  
宗嫡派堪步武奉常司農並廉州筆力直與倪王儔彌孫  
存素亦妙手江湖契濶隔幾秋晚春攜畫來見投滿窓紅  
日花影稠開軒展翫忽叫絕恍如坐我太華縹緲仙人樓  
仙人不可見丹竈空長留石磴太古水化作白雲流雲流  
渡傍渡紅出桃花樹板屋三兩間知是誰人住似有鉤輈

格磔聲崦複林迴無覓處橋西一望波漫漫此是江頭第  
幾灣風帆一葉去不息羨渠投老還鄉闕君今妙藝竟至  
此昔賢已有替人矣五嶽眼前遊可臥樓角月懸壁半破

紅蕉書館賦呈紫滄師

寒松骨氣鶴姿儀姓氏元龍四海知白首名遺千佛榜青  
氍老作六經師雲堂每聽鯨鐘動家塾仍嚴鹿洞規燭跋  
尙遲請問出先生未是欠伸時

過傳是樓贈徐大桂門

德諒

寶胄清才數白睂烏衣誰問舊生涯顛吟君已成詩癖狂  
飲人還罵酒悲綠野亭臺鋤藥圃淡園梨棗析薪炊淒涼  
萬卷樓頭月曾照尙書手勘時

春盡日同人橫塘泛舟分得窻字

花飛千點燕飛雙  
畫舸亭亭傍薜缸  
煙浦半篙輕碧水  
酒樓三面小紅窗  
遊偕舊友能行意  
笛倚新詞未入腔  
今日送春須盡醉  
綠陰明日徧橫江

登陽山

飛鳥峻峭怯往還  
支筇賈勇上孱顏  
日銜綠樹盡頭塔  
雨在白雲生處山  
閨歲節遲春較  
緩芳林花落蜨初閒  
到來大石山房坐  
舊德清名跋想間

前明王濟之先生別業在焉

感秋九章

有序

首夏先君歿後久不至山中  
日月云邁忽忽深秋傷  
霜露之已零痛音塵之永隔  
身心憔悴同於灰木我

母諄令復理舊業勉赴研山書堂時值候蟲吟砌獨  
鶴警宵觸緒關情悲愴誰訴偶賦感秋詩聊抒抑鬱  
寫哀悰而已

空谷滿秋聲涼意淒心骨蟪蛄學人語徹夜啼不歇敗葉  
四山下飄零感存歿昔歷皆實境追想轉恍惚念酬罔極  
恩有力亦難竭愁人怕更長風漾一簾月攝我冰壺魂去  
貯廣寒窟

求名非吾願親志不可違屏迹深谷中寂寞鎖烟扉圖書  
列几上兀兀忘渴飢尙友古之人警欬聆珠璣思親親不  
見言在姿形非夜烏啼霜樹血淚染麻衣佛堂晨鐘打書  
燈尙熹微松窻斷人影幾片白雲飛

蚤歲遘閔凶憂居人事倦塵緣思解脫紛擾安足戀西風  
颭紙燈飛光逐流電冉冉秋欲暮寂寥景狀變極望千林  
寒重來款僧院拜佛不祈福手撚幽花薦老鶴喜足音裴  
回認我面塵生壁挂琴泉渴匣貯硯空廊尋履迹青苔已  
踏徧疎花倚錦石淒絕失舊綯

上方鐘磬寂塔院叢鈴語新涼入布衾瑟縮聊獨處窻閃  
黏竹螢案竄撲燈鼠豪宕意氣消閒工寄刻楮昨宵夢遠  
游杳杳千山阻提籃拾瑤草雲深去何所仙扉洞壑深因  
緣尋道侶清泉可以酌白石可以煮夢醒一牀霜鸞鶴似  
曾許佇盼餐霞人挈我共遐舉

古人不見我我思見古人人歿代云遠翰墨留精神先子

抱古癖祕賞多藏真零縑及斷楮貴逾拱璧珍綰角趨庭  
日性喜圖史親偶繙古名蹟拈豪學效顰自抱人琴痛雲  
烟隔前因小齋一廚畫封識網蛛塵開囊細展翫宛然手  
澤新指眼欲撫寫泔泔涕沾巾

時運際屯蹇俯仰多偏仄萬象淒以清山水情亦匿幽花  
放牆角坐對如集棘愁懷紛亂絲縷縷費抽織前塵已渺  
茫後事難推測空園風雨夕此恨知何極靜夜展瑤編低  
映青松色

讀書書尙多斷愁愁復續踽踽抱孤影熒熒栖荒谷霜光  
滿地流秋思在殘菊長簟寫涼波蕩漾不可掬蟋蟀戶下  
鳴伴予守幽獨采芝那療飢種竹或免俗經世祗妄念困

學且畫粥羽毛惜摧殘吾寧爲雌伏

石氣添慘晦杉梢響暮雨雨聲更更滴滴入心頭苦下帷  
對影坐山村斷譙鼓停雲感舊遊文采難僕數吟壇漸零  
落褰屐散三五大雅重扶輪敦槃盟孰主所思雲水隔迢  
迢望秋浦燈暗不生花山鬼窺窻戶

人壽非金石煎熬到百憂寓形在人間擾攘何時休庸庸  
紛嗜好安能副汝求淡泊守素志身外無可謀涼眠石上  
雲閑上竹間樓水光蕩几席恍悟身世浮五湖吾泛宅煙  
波狎輕鷗桂香明月滿空載一船秋

重拜靜公影堂

有序

靜然上人與先君訂方外交風雨寒暑往還無間病



中曾從學佛先君歿後未閱月靜師忽來云昨宵夢  
尊公結伴往靈棲去緣前生同爲禪侶恐老僧亦不  
久在塵世矣初以爲戲言不數日師卽示疾疾亟仍  
持課誦不輟詰朝索香水沐浴趺坐合掌說偈逝佛  
言因緣之說豈無因哉

音顏一別記難真誰是金剛不壞身梵篋香消全浥雨禪  
牀繩縛半封塵吟來落葉詩前讖悟徹拈花定裏因支許  
石交緣未了下泉還有授經人

畫二首

日落迴廊壁熏鑪香篆息庭空不見人秋在青苔色  
四空雲似墨十日雨不止石亭如小舟煙水空濛裏

聽雪閣

縣流如白練直下一千尋萬古荒荒色天風吹至今松門  
晴亦雨石磴晝常陰何意空山裏長留韶濩音

小憩寒山放鶴亭作

片雲何處來忽作原上雨斜陽明遠山雙禽投極浦石亭  
悄無人隔澗聞樵斧

過黃丈野鴻

子雲山居

谷口林深接嶠村日晴籬落散雞豚麥田過雨翠浮屋澗  
水流花紅到門榻有異書真士福山容高枕卽天恩閒來  
一叩長吟閣硯譜茶經共討論

微雲

心遠見高際  
天空得靜機  
人煙紛欲暮  
鴻雁尙同飛  
冉冉度遙岫  
迢迢入太微  
君看今古事  
則是此依稀

秋郊

乳鴨聚塘坳  
何人此結茅  
花村山四抱  
石閣樹雙交  
暖日裂瓜頂  
清霜染橘包  
野祠無祭賽  
門戶網蠨蛸

題馬和之十八應真卷後

冰綃幻出貝葉紋  
南渡侍郎留手痕  
莊嚴自在應真像  
筆尖所到神變存  
境幽林茂果何處  
無乃舍衛給孤園  
兩兩迦陵相對立  
半天紅射扶桑暎  
一人左右手作印  
蒲團跏趺依脩構  
寂默身披安陀會  
五衣萬年一念忘勞煩  
一人咒鉢兩龍出  
九霄蚺鰐相騰翻  
四人旁觀齊仰首  
喜者失

笑驚者奔橋外小亭映深竹中有一人白佛言五禪九定

十回向似將各一疏真源崑崙兒侍捧香篆羯布羅

龍腦香

氣何氤氲花間石榻綠熊褥一人熟睡無朝昏津梁若疲

豈神定何以滋茂精進根一人入定等枯木旁有怪立頭

如黿胸際諸魔久調服作此伎倆徒殷殷一人持經默自

課麗斜權頰清而敦至人不染文字相三塗八難俱堪焚

阿輪迦下

無憂花樹也

三人坐共觀圖卷相評論六種震動證神

力普示閻浮解脫門侍兒旁持鉢塞莫

數珠也

心有所悟手

自捫一人右肩獨偏袒手振錫杖湧慈雲八萬四千母陀

臂徧與一切接引恩兩人跣足對戲水水流赴石聲潺湲

驚濤不敢近衣角化作萬道明珠噴有時捉出水底月將

來貯向瑯璃盆獻珠龍女淩波立飄飄委佩從風掀雲鬢  
霧鬢態綽約翩然抗手如鸞鶯一人棱棱瘦露骨猛虎弭  
耳身旁蹲情與無情俱已泯異物可撫同家豚昔人作此  
豈無故迷途苦海多愁怨特開生面留宇宙憑仗佛力爲  
牽援若云諸相本無相髻成德安胸中文現出薜萄色世  
界是空是色誰能分沈檀匣盛錦褱寶珠纓鬢垂續紛  
六時懺悔菩提記清磬紅燈礼世尊

上方寺

鐘聲落上方一徑轉崇岡石隙秋泉碧峯頭晚日黃僧憑  
崖作屋圍以竹爲牆窻紙風吹盡無人到影堂

睡起

小院沈沈日向晡  
匡牀睡起擁羅襦  
玉籠廊曲調鸚鵡金  
井花陰響轆轤  
說鬼不嫌才子幻  
攤書常勘古人誣  
鑪香一穗琴三疊  
誰寫閒身上畫圖

汲雲庵詠食物四首

風雨梅

落實筠筐滿清芬  
漬露飴製宜香積  
鉢貯取碧花瓷  
龍腦嘗新後雞鳴  
感舊時虛窻茶話  
罷冷韻沁心脾

碧蘿春

名漏茶經錄靈泉  
品若何香分雪海  
月色染洞庭波採  
擷連雲遠清華得  
氣多松風喧石鼎  
幽興發吟哦

松花蕈

種自天葩茁雲根潤澤涵采芝仙女誤食肉鄙夫慚味澹  
和蔬煮香凝勝藿甘僧雛攜斲去帶雨摘盈籃

燕來筍

時雨先春降脩篁暗走鞭社期元鳥至屋角蟄龍穿碧玉  
剛三寸雕梁又一年鄉園風味美飽食坐談禪

訪惠徵君定宇

棟

先生賦贈三首

老屋寒氈六十年白頭燈火舊因緣徵書束帛邱園賁校  
本遺經弓冶傳漢學世誰宗五鹿清門人自仰三鱸葑溪  
卽是山陰道雪夜催開訪戴船

時舊舉  
經學

剪燭圍鑪奉屢絢精研祕籍總膏腴清言直瀉瓶中水妙  
義如探海底珠一綫保殘存絕學三才貫弗識通儒元亨

問難窺奇字猶愧多聞近末膚

曼倩窮愁苦忍飢買文錢待給晨炊著書娛老真清福稽  
古求榮亦笑資家守青箱繇祖澤花開紅豆苗孫枝古歡  
要結千秋賞對酒掀髯酌瓦卮

書館夜讀聞隆福寺鐘聲

譙鼓統統轉四更新涼微覺袷衣輕芸窗殘燼三千歲蕭  
寺靈鯨百八聲打醒癡魔同警枕喚迴短夢泥淒淒檠筠簾  
斜漾明河影寂寞霜天夜氣清

冬夜期友人不至

遲客幽齋裏嚴城夜漏催風驚隔戶竹香送過牆梅寒月  
明如此停雲殊未來清宵無與語懷抱鬱難開



屠維大荒落

素心蘭十二韻

山空人迹絕雪瓣幻天工就予雙清格留茲太素風痕涵  
春雨碧豔冷夕陽紅

蘭名

紙閣深深護銀屏曲曲通情移

初佩客價索賣花翁泉貯黃瓷斗音諧綠綺桐相看真不  
厭獨處悵何窮韻寫瓊枝外光生虛室中靜能平躁志潔  
許表幽衷妙會香兼影微參色是空花開憐寂寂客去訝  
恩恩總帳邀明月鮫珠滴露叢

先君性愛素蘭  
多手自培植

逸園梅花盛開酬主人程自山

鍾

仙人鋤明月種梅三百樹綠以青粉牆意欲將春護忽被  
風牽引春色關不住萬箇白玉蜨飛向人間去

何畹芳蘭陸錦雯綱早春過訪信宿山齋臨別得

句贈行二首

雲容嵐影溯清緣竹閣聯牀夜不眠  
弦月乍沈鐘未動三更茶話佛燈前

旖旎風光惜麗辰峭帆輕翦半江春  
空山無物堪持贈折得梅花勝美人

六浮閣

名流觴詠地奇絕境無雙磴仄湖三面  
樓高月半窗吟壇文藻歇空谷足音  
楚漁子閒吹笛煙波挂綠簾

假山

春雨新晴碧蘚斑數峯高下列煙鬟  
高下位置隨人意穿

鑿痕留笑汝頑客主曾傳蕭宅請兒孫誰截華山還疎簾  
清簟南窗臥相對疑居煙靄間

題隱者村居

高人卜築向蒼崑渺渺川原一閣銜易去易來春樹鳥衝  
風衝雨暮江帆鄰知問字先堪愛奴解栽花便不凡何日  
攜家來此處伴尋黃獨荷長鑱

七十二峯閣觀雨作

碧瓦朱甍遍太清此間無異住瑤京不須更乞時人畫水  
墨林巒雨寫成

感春

江城春又至莫問酒鎗空客到談新事花開坐下風光陰

詩卷裏身計硯田中笑指高齋壁誰憐此爨桐

郊行

獨坐意不愜郊行日未斜回頭空渡樹迎面遠村花寫景  
憑詩瘦探幽任路差一旗風颭處喜近酒人家

初夏卽事偶成

擘箋纔作送春詩又是梅青麥綠時深樹殘芳餘帶在前  
庭濃蔭似雲垂暴暄天氣人人倦靜晝情懷事事宜池面  
魚兒爭出沒簷牙燕子共追隨青荷如鏡翻輕葉紫筍成  
竿解嬾枝石出東溟形最古僧來北嶽語多奇偶繙畫篋  
逢殘稿小憩晴窗譜舊棋稱體衣輕行路健焚香風定出  
簾遲生憎夜雨琴先覺惟值閒吟酒不辭折柬嬾招方外

友勝遊空負牡丹期

山中晚歸值雨作

下山值天暮風驟雨如注雲昏不辨村龍怒欲拔樹穿雨  
獨還家電影照歸路

獨酌

紫蟹黃雞間菊蘗節過重九意何如滿斟遠客相貽酒徧  
讀名山未見書曲徑童爭風墮栗清池獺覷雨生魚科頭  
跣足從心適地僻無妨世法疎

吉雲庵晚眺

小亭獨上雨初晴遙羨風帆破浪行湖外數峯難了了斷  
虹低照忽分明

書窗

繞榻圍屏護碧紗日長睡起試新茶石窗萬綠悄悄處時  
有香來不是花

題讀書舫壁

如船書屋檻堪臨清淺方塘帶竹林水底風枝搖綠影無  
端驚散守魚禽

劍門

龍淵騰寶匣瓣瓣攢芙蓉鍛鑄大冶力劈削仙掌工石棱  
淬鉞刃白雲截半空奇峯裂一綫中有鳥道通剝然山鬼  
嚇晦景潛其中仰窺天似練只許雙屐容險與虎牢異名  
取蠶叢同捫壁不敢入岑塞疑路窮翻愁靈扉闔終古遭

雲封雙丸歸袖底遙躡飛仙蹤

拂水

氣爲水之母水動由氣壹地行失故道石竅爭迸出逆其  
就下性噴激洩怒鬱雲根穿玲瓏萬斛真珠溢琤琮碎玉  
聲天風吹瑟瑟靈泉伏山下本是至柔物橐籥默鼓盪直  
立若有骨晃漾水晶簾高捲挂瑤闕手挽明河迴飛流濺  
白日上有真武宮金庭鎮嶂帆殿角松濤喧簷溜瀉活活  
長虹跨絕壑出奮雷車疾一步魂一逝觀瀾術已竭倒行  
而逆施其理實茫沕

吾谷

秋深山欲醉畫障開林嵐紅黃飛敗葉慘舒理可參鄧林

驅陽烏火繖擁錦驂金霜殺浮豔冷情太沈酣峯迴線而  
曲洞腹窺訝谿地僻塵迹遠慣許幽人貪如環復如抱妙  
在徐徐探泉聲與石色中有古澤涵忽訝夕陽候倒影澄  
空潭尙湖明一碧月浸南山南

三峯

萬松塞谷口人隨白雲入蒼雲翳四時不雨亦晦溼西風  
吹青鬢冷翠滴簞笠一松各一狀奇變不相襲矯若孤鶴  
舞慘疑瘦蛟泣百轉山徑窮仍在松陰立巖磳繡苔蘚窘  
步芒屨澀奧境出名藍古鉢有龍蟄僧雛會款客前導每  
長揖浮圖霄漢外拉予登幾級入山深復深煙霞儘噓吸  
松花仙人餐去同瑤草拾



芙蓉莊紅豆樹歌

海南名種相思子劫火灰燒心不死仙莊勝蹟傍琴川一  
株紅豆分明是是樹今經二百年虎頭飛舄近炎天歸裝  
檢點攜廉石豔卉扶疎載畫船尙湖湖邊東澗路雨葉風  
枝朝復暮院落清陰悵寂寥看花人去思前度仲蔚荒園  
徑已虛丹霞一片落霏霏梁海燕新巢穩漁父桃源舊  
路非黨魁名姓歸司隸休官一去空揮涕江南零落老尙  
書菟裘聊作投閒計絳雲樓閣耦耕堂書卷叢殘意黯傷  
上林目斷三株樹水國溪迴十笏房主人頭白寒燈裏竹  
屋柴門爨具徒無那風心老更顛名花坐對真連理猩紅  
一捻正鮮妍檀板珠歌夜不眠枉將旖旎三生夢懺向香

燈繡佛前紅豆花開復花落江山回首還蕭索望帝魂歸  
泣杜鵑海棠枝上悲風作亭成野史笑遺民枯斷靈根二  
十春那堪東海揚塵後重話西園介壽辰的皪流丹餘一  
顆金盤瑤席陳珍果玉簫重倚右丞詞火齊爭看錦繡裹  
無奈天家雨露銷萬年枝折影飄騷松圓仙去薜蘿老墓  
拱青楊宿草凋兵燹文章留浩劫江村潮落流於邑酒旗  
歌扇斷前塵草堂敲塌鮪鮪泣百歲華胥逐景光嬾枝新  
茁發生香石家別墅仍金谷晉代名園賸辟疆人間結實  
寧須促橋頭猶見繁英簇區區一樹變枯榮彈指興亡如  
轉轂秋風江上夕陽斜說與漁樵莫漫誇傳來花月新聞  
句留取東京譚夢華

謁光祿卿沈敬亭

起元

先生於學易堂敬呈四律

靈光江左望嶙峋粹德清名邁等倫  
一代龍門真理學三朝虎觀舊儒臣  
立身喬嶽巖巖象被物光風霽霽春星  
斗文章雲鶴表如公方不愧天神

典領雄藩懋守爲與人爲誦口爲碑  
民爭讓畔傳三輔吏戒懷金凜四知  
身退歸來甘拙宦學純老去作經師布  
衾檢點平生事白日青天總不欺

硯耕壯齒歷辛艱游藝工夫本素嫻  
偶對雲泉臨北苑那煩絲竹伴東山  
詩壇垂白揮豪健易稿研朱著意刪  
自署小齋虛直字清風勁節共蕭閒

儒林循吏兩難并事事光爭青史名  
制行要師黃叔度傳

經合拜鄭康成絲蘿誼篤通家契桃李蹊殘感舊情末座  
心香傳一瓣空慚雛鳳繼新聲

先君幼年受業先生之門  
灑淚感懷獎勗倍至

### 白蘋花

水面繁葩雪片鋪渚鳬沙雁戲相呼寒江風露停舟夜月  
影茫茫淡欲無

### 月夜歸山館憩道旁古墓

悲風吹白楊枯草瘞白骨不知泉下人可見人間月

### 弇園詠芙蓉

高地種芙蓉看者悉引領我亦步月來滿地踏紅影紅影  
上我衣如雲到骨冷松邊有石磴高與花梢並我因立其  
上雙足出花頂遂令花萬枝俱遜我一等

村夜

歲暮荒村裏山昏人不行  
風乾月有暈溪凍水無聲  
鄰犬號寒急窻燈照影清  
梅花消息近買棹返江城

歲暮過穹窿上清宮贈道士陸寒碧

月牖輕霏瑟瑟塵高寒直與九霄鄰  
碧城新闢瓊華室也似人間貯玉人

帝座司香職亦清金丹曾說學長生  
雲巾翠袂攜魚鼓閒向松陰唱道情

風硯煙煤手捧持瓊牋索寫步虛詞  
空山不解籠鵝送折贈寒梅第一枝

沈水鑪香會辟塵那須壺嶠證前因  
中庭笑指三生石雪

幻聰明鶴幻身

神弦曲

黃楊簪冠鬱金裙女巫歌舞降神君彩蚪木鸞恍有聞旋  
風獵獵寒透骨金支翠旗遙出沒天低野迴斂餘照屋角  
老梟聲似笑肉飼飛鴉酒溼苔紙錢捲出牆頭灰醉飽得  
財女巫喜病人房中臥不起一燈青熒小於米

秀水門人王復編校

靈巖山人詩集卷三

靈巖山人詩集目錄

第四卷 古今體詩

硯山怡雲集

上章敦牂

香雪海探梅歌呈沈宗伯歸愚

德潛

先生

梅花十首

曉起

指月庵

遊上堯峯

述哀十六章

殘菊歎

山齋夜讀

秋堂對弈歌爲范處士西坪作

有序

重光協洽

空谷

法螺庵

千尺雪

天平山

白雲泉

華山

天池石壁

香雪海



鄧尉山

楓橋訪沙丈斗初

維杓

曹大來殷寓居東禪寺作春日雜詩邀予屬和  
因次其韻四首

小石壁納涼作

楞伽山寺

山館早起

巖秀才冬友

長明

過訪山園留宿畫船塢論詩

韋左司祠

吳淞櫂歌五十章

有序

題北宋巨然岱嶽圖

暮冬雜詠十首

冷月

晚風

臘雪

曉霜

凍筆

煖硯

火鍋

冰蘊

竹鑪

盆梅

靈巖山人詩集卷四

鎮洋畢沅秋帆

一字  
穠蘅

硯山怡雲集

上章敦牂

香雪海探梅歌呈沈宗伯歸愚

德潛

先生

雨花橋頭雪一尺  
混茫花影連天白  
白鶴雙雙導予入  
青崦閒倚船窗吹玉笛  
蒼蒼海嶺才到此  
何境雞鳴人寂迺  
似懷葛古時之光景  
閒閒才到此何民  
掃花鋤藥迺似防  
瀛海上之仙人一  
重一掩梅花村半  
鉤黃月垂黃昏  
溪迴谷邃中有逋  
仙老鶴輩幽居聚  
斂梅花魂款門見  
花人不見萬樹橫  
山環缺白雲空古  
幹彌縫遮

面面上有青松綠竹  
水仙花花間閒田餘幾棧老人補  
種桑與茶梅花泥予若有招隱意溪山罨畫曷不香國來  
移家詩翁閒情與梅似五湖一片空烟水愛梅掃石坐題  
梅裙屐追陪詩弟子春風只在杖頭吹銀瓶美酒斟酌之  
薄醉橫琴譜三弄繁枝冷豔蕤蕤霏清詞孤篷歸載寒香  
重曉禽啼破羅浮夢

梅花十首

側側東風淡淡煙蕭疎最愛硯山前琴中舊曲誰三弄江  
上相思已一年老榦不花香亦烈空腔著蘚態逾妍幾灣  
流水千尋壁有客衝寒正泊船

霧縠冰紈學素妝天生真色雪生香斷橋水咽三更月破

驛門局一徑霜何必隴頭傳雁使只宜楚客貯瓊牀孤寒  
不入朱門賞宰相空迴鐵石腸

重跗疊萼玉成堆一樹和煙亞澗隈霜磴何人侵曉上書  
窻爲爾忍寒開入山每曳孤筇訪隔院休將短笛催縱有  
丹青難貌取槎枒偃蹇半身苔

占得春光第一分從來蜂蝶斷知聞蕭然世外原如我悄  
爾窻前定是君疏影入池成古畫濃香出屋化寒雲生平  
無意矜高潔冷淡風情自不羣

莫聽臨風玉笛聲曲中只惹客愁生不知我者誰心賞若  
有人分與目成自覺文章趨古淡君真冰雪淨聰明筆牀  
茶鼎鉤簾坐玉照虛堂四座清

愛著山人白紵衣高懷冷淡世應稀半龕燈影僧初定雙  
崦雲香鶴未歸門掩小籬春寂寂廊通深院月微微嚴寒  
料峭風剛緊莫化東園玉蜨飛

水邊林下見瑤姿幾度巡簷有所思山郭雪消風定後石  
亭人去月來時誰將鶴膝蜂腰格寫出郊寒島瘦詩相對  
不須傷歲晚淩春纔放兩三枝

梅檀臭味玉精神一種孤高屬性真薄霧雀聲山店暝初  
陽霜氣草堂春昏燈曉角回幽夢片石寒泉證夙因怪底  
絕無濃冶態寂寥姑射本神人

疎籬曲折水灣環香浥空林寂掩關大地羣芳皆後進先  
天妙悟在空山三三寂徑成長往九九飛雲鍊小還飽歷

霜寒惟予汝豔情穠致已全刪

瓊島珠塵罨畫欄鏤冰刻玉作奇觀白衣首許朝青帝素  
女同遊馭彩鸞能爲世風留太古須知天意試奇寒碧山  
似有人招隱閒抱焦桐石上彈

曉起

空簷鵲噪惱幽眠強起呼童吸曉泉說是昨宵春雨急落  
花吹滿釣魚船

指月庵

殿影浸湖光前朝選佛場古苔青奪路春柳綠過牆僧老  
忘真臘幡輕颭妙香勞生何日了我欲問慈航

遊上堯峯

石級盤千仞林開見寺門落雲壓鳥背飛澗斷崖根木榻  
枯禪定苔龕古佛尊不知何歲月無字古碑存

述哀十六章

哀哀孤兒罹此閔凶重閨奄棄鞠我不終遺硯沈碧飛燐  
瘞紅吳淞秋冷淚染丹楓

聞善則喜損已益人風潮告災萬竈沈湮施棺煮粥全活  
海濱抱濟世心非濟世身

先君不祿載換星霜風飄總帳遺挂中堂跼天踏地一存  
一亡白頭扶杖顧影徬徨

痛深伯道相依弱息我母至孝兼定省職必誠必敬爲閨  
門則懼傷親懷淚痕暗拭



長跪牀下手調湯藥衣不解帶水不沾勺代死不得淒神  
苦魄曷解瘋憂顙通冥幕

玉臺瓣香系出清河斷機截髮迭丁坎珂門祔零落隻手  
枝梧清宵課子辛勤柰何

嗟予小子五齡就傳夜臥同衾曉餐含哺珠玉逾珍疾疹  
是懼拈韻吟棋亦欣穎悟

傷親棄予風啼雨涕魂墮九泉杳冥無底自憐煢獨曷期  
康濟鐘鼎光榮不如負米

彌留遺令績學程功式穀未竟飲恨安窮青雲迢迢不到  
眼中瓊樓桂影吹斷天風

節序驚心秋橫碧落影閃筠簾塵昏板閣空山此身欲往

無著和予悲吟孤媛瘦鶴

藐茲諸弟一綫伶仃基繇有構器守挈瓶殫予智能曷慰  
先靈下泉心事慘照魚燈

墓門攢棘宿草霜靡繞樹烏啼啞啞不已親恩罔極親年  
寧族海不西迴終古如是

陽輝韜景幽泉寫怨鬼瞰我室叢伏方寸搖搖靡寧神智  
頽頓我欲芟愁愁根滋蔓

青燈如豆翳光殯屋不知夜深展卷卒讀寒蟬入帷牆根  
鬼哭非是鬼哭一窻風竹

丙舍荒寒麻衣伏處藜牀明月終宵爾汝夢見親顏寤來  
何許遠浦漁歸石人私語

愁縈萬縷。膺填百憂。有生無生。自春徂秋。枯楊悲風。靡時  
有休。青山埋骨。天道悠悠。

殘菊歎

一夕西風緊。空階已隕霜。金英開復落。晚晚暮園荒。籬角  
人將隱。牀頭酒倦嘗。獨留高節在。天意屬孤芳。

山齋夜讀

松直疑人立。風簾夜半開。抱雲成獨夢。花影自裴回。駭鹿  
窺燈走。淒鴻趁月來。博山香漸燼。嬾起撥殘灰。

秋堂對弈歌爲范處士西坪作

有序

處士姓范氏。字西坪。以字行。浙西人以善弈遊江湖。  
間少穎悟。年十三卽成國工。百年來稱第一高手。前

者弈師俱遜一籌性倜儻任俠瀟灑不羣遊歷郡邑  
士紳急爭致之先祖愛圍碁寒煖不徹君至婁常主  
予家寓心遠堂之西齋每對弈州中善弈者畢至環  
觀如堵牆君不甚思索布局投子初似草草絕不經  
意及合圍討劫出死入生之際一著落枰中瓦礫蟲  
沙盡變爲風雲雷雨而全局遂獲大勝衆口謹呼神  
色悚異嘖嘖稱爲仙所獲金無算垂手散盡囊中不  
留一錢時予甫弱齡隅座旁觀偷閒與之弈君讓予  
三子嘗云子若從予學可至次國手先祖恐失學時  
時禁絕之遂作秋堂對弈歌以贈

明軒洞豁筠簾遮衆賓環堵且勿譁東西對壘建旗鼓圍

匱方局無參差五嶽不動四目動死灰槁木形神悚冥茫  
淬厲鍊心兵多算少算務持重戰國縱橫術細論車箱井  
欄舊譜存日月九天黃赤道風雲八陣死生門初投數子  
絕跬步中邊錯落晨星布玉滋霞島冷煖殊手落紋楸後  
先互俄焉兩敵漸紛爭虛堂殺氣宵騰騰每于袖手旁觀  
暇如聽金戈鐵馬聲暗伏明挑先冥索出入神鬼煎精魄  
九邊飛角取遠勢一著攻心乃上策淮陰將兵信指揮鉅  
鹿破楚操神機鏖戰昆陽雷雨擊虎豹股栗屋瓦飛鳥道  
偏師方折挫餘子紛紛盡袒左忽訝奇兵天上來當食不  
食全局破虎鬬龍爭古戰場羸顛劉蹶勢靡常到底輸贏  
歸小劫爛柯人已閑滄桑坐隱仙家藉養性君今海內推

碁聖奇童爭並鄰侯稱常勢真堪積薪競元玉文犀照短  
檠眼中成敗最分明夜半局終涼月上滿窗花影覆空枰  
重光協洽

空谷

溪迴峯勢折白雲扃石戶穿雲得異境幽人此築塢鳥啼  
春寂寂花落不知數蹉然聆足音反受老鶴侮勝地昔疏  
剔褻屐萃三五佛贊盥手抄琴歌橫膝譜溪山旖旎習洗  
滌到睂嫵凡夫久仙去松竹誰爲主壁間鐫草篆筆力挾  
強弩手種雙梅花香影帶峭古餐霞眠月人任爾自攜取  
松子滿石牀無人坐揮麈山風吹午夢林端響樵斧

法螺庵

貪幽不知足絮入境已深煙鬟互虧蔽賺我尋香林如珠  
穿九曲旋轉窺山心斗大一蘭若推窗延翠岑鼠竊僧鉢  
飯雨頽佛面金妙參禪悅理偶弄百衲琴此是安心竟屏  
祛塵慮侵花間人悄悄石潤雲霏霏不知人間世可聞鐘  
磬音

千尺雪

寒山出寒泉雲骨窮剔鐫截蓄乍渟演沿洞旋潺湲縱之  
使一落銀漢秋空懸石剛水性柔怒激不受憐鬩闢肆歎  
飲山鬼防驚癘跳珠碎玉聲恐攪幽人眠幾費巧匠斲久  
之得天然小閣題聽雪蕩漾清冷天探源得咫尺豈能計  
以千聽泉卽聽雪妙悟泯真詮

## 天平山

象緯拱天闕，剡圭矗霞表。芙蓉劒鏃鋌，不敢度飛鳥。峯峯  
比排掇，元氣破靈顥。百神雲車馳，金翠盛羽葆。儼列五等  
尊，未覺三台杳。名山鍾偉人，范氏此卜兆。文正少畫粥，孤  
露苦潦倒。鬱極始發祥，相業實皎皎。手澤藏家祠，印石當  
墓道。展拜仰先哲，高義圍名好。山高水長風，後樂先憂抱。  
靈區森萬笏，特立不可撓。如見廷諍時，直節欽元老。

## 白雲泉

雲從石上生，泉自山下出。網緼滲靈滋，水行感氣壹。青壁  
繫飛梯，纚纚見垂鏞。天井透紫霄，石竅漏白日。淩虛架危  
構，中有散花室。璇珠噴乳竇，泠然風瑟瑟。仰窺羣峯攢，奇



更五迴幹徑塞測花幽磴細入竹密秋豪緣偈仄怒石如  
我叱到來生面開洞房石扉豁僧言最上層雲深泉更洌  
私忖再期可那計三而竭輕舉追升猱側翻驚健鶻躩身  
立雲頭千狀變一瞥霞靄噓吸間排窻列翠笏活火烹泥  
鎗碧蘿煮瓊雪品兼色香味助我顏色悅靜聽松風喧酌  
以先供佛證彼淨明因滌予廣長舌三泉自上下其源來  
自一山空暝色赴歸趁飛鳥疾古澗一泓澄倒浸東嶺月  
雲影挾泉聲回頭倏已失

### 華山

羣松夾雲路雙屐溼翠影危磴裏裏垂鳥道界遙嶺探奇  
意漸賒銳進氣益猛牽藤捫絕壁擲足亂雲頂湖山奇絕

處一覽收萬景止宿叩禪關戒規靜且整竹深僧貌寒月  
暗佛燈耿山空木葉下秋與鐘魚永仙掌障金天同名各  
異境逝將登太華絕險試鐵縷手攀十丈蓮塵顏浣玉井

天池石壁

長劒倚霄影險剷天根碎卓立一萬尺灝氣幹無礙泓淵  
洞幽潛玉漿酌沆瀣一寸龍蜃蜃景光翳冥晦終古此開  
鑿雲雷出其內吳中富名山奇峭獨拔隊鬼斧初削成具  
體擬華岱飛梯駕虛壑漫驚蛇倒退

香雪海

天風吹縞袂著予妙香域梅花千萬株雲關受填塞暗香  
夾一衍其深不可測橫斜兩三枝低礙帽影側銀濤翻珠

島靜涵太素色茫茫荒寒境梅疑被雪逼是雪還是梅真  
幻兩莫識歸舟泛青崦煙水空相憶明月淡黃昏春光白  
鶴得

鄧尉山

幽絕巖斗柄曲曲梅花村籃輿進不已山深花更繁一重  
又一掩遠帶殘雪痕橫斜交左右手把瓊枝捫和風送香  
影陣陣如雲奔峯腰露殿角知有古刹存紅牆銀漢外萬  
樹山門屯拾級還元閣煙靄幻曉昏具區排白浪瀕撼坤  
維垠金庭玉柱間倒插虛無根湖光蕩花光一氣互吐吞  
清遊賞心愜亦荷東皇恩寒香沁神骨襟袖驅溫磨松林  
翠羽夢佇遇梅花魂

楓橋訪沙丈斗初

維杓

破屋低頭戶透風窮年兀坐故書叢若論孤潔人千古未免揶揄鬼五窮遯跡底須塵闌外詩名多在布衣中鐘聲夜半寒山寺漁火書燈穗穗紅

曹大來殷寓居東禪寺作春日雜詩邀予屬和因

次其韻四首

笑予身鹿鹿傳爾詠鵝鵝詩就凌長慶書成逼永和名心因佛淡酒債爲花多聞說橫塘好相期撥棹過

鑪香縈小閣瓦雀下閒階冒雨支藤杖從僧借筍屨爲鈔菩薩戒聊學太常齋侍立奚童巧先將筆硯排

無心夢忽驗屢卜卦無靈避日移吟榻遮風置幔亭客看

塵壁畫佛守破樓經薄暮收書卷凭欄聽鴿鈴  
偶談經歲事暮閣對匡牀竹裏風多韻花間月有香夢遊  
嫌夜短鄉訊愛書長爲我常消渴中廚索蔗漿

小石壁納涼作

避暑得寂境靈抱暢瀟灑側磴入竹深冷翠滴雙眦拂面  
青琅玕翻風學人拜高桐掩寺門扶疎影入畫曲塢一亭  
幽木榻共僧話樓破蝙蝠出牆頽薜荔敗北軒面削壁積  
鐵礮阻阨石罅生短松虬枝倒垂龕泉分黃茅嶺涓涓瀉  
清快輕雷挾雨過濺珠聽澎湃開我讀書窓宛臥清涼界  
只領羲皇趣不受菩薩戒清露溼葛衫塵慮絕纖芥蟲語  
淒斷夢鬼燈聚作怪孤悰逐白雲隨風松頂挂

楞伽山寺

越來溪上慣淹留  
況值琳宮水石幽  
湖影入樓天不夜  
竹聲到榻客疑秋  
太涼未可成長住  
得暇還期續勝遊  
一葉烏篷侵曉發  
藕花香夢羨眠鷗

山館早起

空廊茶臼擣龍團  
開幌無風怯曉寒  
一夜瀟瀟山館雨  
芭蕉綠過石闌干

嚴秀才冬友

長明

過訪山園留宿畫船塢  
論詩

妙眼觀自在  
斯秘何人啟  
由來萬象態  
蕭然入隱几  
傳神阿堵中  
屈指無數子  
請看天籟聲  
皆從蘋末起

韋左司祠

別墅終南迹久荒  
滄浪亭畔有祠堂  
清吟半在凝香寢  
大雅翻推執戟郎  
元酒釀淳滋自美  
綠琴彈罷韻彌長  
宵來祈拜無他瀆  
乞把詩源夢裏詳

祈夢最靈

吳淞櫂歌五十章

有序

予家籍隸崑山舊居東南鄉之綠葭浜濱臨吳淞江  
先塋丙舍在焉春秋展墓或採訪戚友歲必數數至  
至則盤桓佇戀時與漁父棹孃作水天閒話風帆一  
葉偃仰於白蘋紅蓼間秫酒魚羹意興閒適此則倚  
棹而歌彼則扣舷而和霜天月夜韻徹寒霄餘音常  
在耳也山居閒靜人事不接松閣雨昏心情無賴每  
憶放艇柳陰怡情蓮渚水鄉景色其人宛在聊作吳

淞櫂歌五十章譜江國之風謠記漁家之歲月後有  
續天隨笠澤書者或可采錄焉

漁家生計水雲中鱸膾蓴羹口食充沽得梅花三白酒昨  
宵江上起秋風

半江碧玉皺連淪點染波光絢好春柳陌雨深泥滑滑綠  
蓑青箬賣魚人

風淒月暗夜揚舲極目長亭復短亭款乃曲終煙水暮艣  
聲搖破一江星

飄零蹤迹逐萍輕野鷺閒鷗訂夙盟一幅布帆千尺浪浮  
家底事更藏名

澱山圓泖衆流通萬頃瑯瑤曉鏡中繫纜柳根魚不得釣



綸空漾落花風

不識人間金翠妝不知織布不提筐自憐命薄如流水生  
長船家作棹孃

潮來纔見月初生潮去漏聲已四更風船不管潮來去脫  
卻蓑衣臥月明

白蘋風冷滿汀洲濁酒清歌幾度秋明滅夕陽波上下玉  
峯翠影落船頭

不插花枝態更妍布裙絮襖度年年那堪灘淺蘆深處也  
傍鴛鴦宿處眠

持竿豈是絲綸手飽食都消齷齪顏世人無限風波惡不  
到江天一笠間

澤國花飛桂棹春落英夾岸漾溪濱到來總是桃源路賺  
殺漁郎去問津

柳梢殘月亂雅催滿面霜華在溯洄我欲賣魚趁曉市主  
人木柵未曾開

羽作飛鳥鐵作貓江關驛路悵迢迢不知水宿風餐客數  
遍江南第幾橋

鷺鷥爲友芰荷鄰飄泊因風任此身茶竈筆牀排妥貼居  
然笠澤著書人

空濛水氣接黃昏港曲溪迴見小村欲知漁隱家何處花  
外簪簪挂到門

蕩槳吳娘顏似玉風窗無幙亦無簾貧家莫笑艱妝具常

倩冰輪當鏡匳

曉日初升好駛風飛帆直指海門東紙錢飛上高桅挂一  
盞靈泉賽孟公

不遇恬波便激湍人生且作蕩舟看來船風逆去船順到  
此天公亦兩難

青洋江水拍吳塘一水盈盈兩地望家書題就平安字後  
夜潮平寄夜航

畫船簫鼓蕩中流白塔淩虛倒影浮八月十八潮生日問  
潮館外看潮頭

紅情滿滿一江香篷底風涼卸脫妝恨殺荷花嬌不語伴  
儂長住水雲鄉

滄波淼淼暮雲空  
天壤何方著釣翁  
夜靜沙明爬郭索  
緯蕭深處一燈紅

聊憑馬遠荒寒筆  
寫出扁舟獨釣圖  
歷盡驚濤還駭浪  
始知水面是夷途

一葉村航手自划  
春三展墓泊平沙  
到來丙舍連漁舍  
門遮江流是綠葭

終日垂頭手一竿  
釣魚漫把羨魚看  
漁師竭澤網罟密  
瑣族幸托江湖寬

沮洳未必有潛鱗  
枉約韓侯問水濱  
君欲釣魚須遠去  
斯言誤盡世間人

人掩柴扉鳥入林  
山歌清韻雜寒砧  
恨他月子彎彎影  
不

照天涯蕩子心

入夢維魚卜歲豐衣完食足樂融融白鳧拳足如人立修  
潔終須讓此翁

曉辦朝餐夕穩眠世人幾輩羨臨淵游魚若不貪香餌任  
爾垂竿也枉然

徑雜花深感路歧行人惘惘欲何之一篙綠到斜陽外紅  
雨聲中喚渡時

酒食麤供喜有餘不勤耕稼不攻書到頭堅坐危磯穩夢  
斷飛熊載後車

新漲一痕添鴨綠長條萬縷染鵝黃郎心似水難留住一  
夜將愁送渺茫

郭外春風颭酒旗  
隔溪開遍杏花枝  
遙村紅日三竿上  
正是漁家曬網時

浪花無際拍長天  
人老江頭亦可憐  
看到斜風細雨後  
衝波幾隻罾泥船

采蓮秋老采菱忙  
水調歌殘怨女郎  
菱角易添心裏刺  
藕絲難製嫁時裳

縱橫港汊路難窮  
人住婁江東復東  
莫道兒家顏色好  
水萍花影作屏風

骨肉人生那易全  
羨他逋跡五湖邊  
朝朝風浪掀天起  
一世團圞在一船

長日灘頭理釣筍  
花難落盡水難窮  
晚來風起蘋花末  
人

在紅雲一鏡中

清景無多得未曾支殘水枕思曹騰夜深荻岸呷呀響殘  
月光中有一層

幾年幽夢落江湖那問當身境苑枯草澤自饒生計足時  
清稅不到魚租

綠波澹淡乍生春隨淺隨深舟自橫底事誇他食肉者葦  
羹一盃佐香杭

凍壑無魚下網空天寒口腹亦難充青油畫燭圍鑪坐不  
遣風光到雪篷

雙橈蕩去木蘭舟看破浮生水上漚無姓無名人不識妻  
孥不做傲公侯

不羨名高廁隱淪天容位置作波臣憑君翦取吳江水難濯塵寰執熱人

書屋三間瞰具區幽棲人喚列仙臞梅花庵主煙波侶粉

本叢殘漁父圖

予家藏吳仲圭漁父圖畫卷

舴艋輕搖日已暝天寒野宿繫荒汀雙魚網獲上市去換得新醪滿瓦餅

瓜艇小於屋間半釣鉤懸似月初三鄰船玉笛吹鳴咽雲影波光寫蔚藍

白頭人瘦臥江干破被寒添月已殘一夜西風迷放艇荻花如雪滿空灘

遙傳蕭寺五更鐘水遠雲深隔幾重月冷金霜篷底落一



宵顚顚到芙蓉

魚網原來人網殊浮蹤泛泛水中鳬商量他日頭銜署此  
叟應教長五湖

題北宋巨然岱嶽圖

歸雲堂中雲模黏瓊笈啟眎真形圖齊魯餘青青不了玉  
雞飛逐金烏孤紫閣噓吸通帝座尊嚴氣象人間無隱几  
此身入畫裏攬裘走向黃公壚酒酣酣臥白石磴清風引  
我涉幽徑月浸龍淵寒雲虛鳥道盤斷崖留古雪峭壁挂  
驚湍丹梯一步一易狀置身忽在千峯上一杯滄海問蓬  
瀛鸞笙鳳管來雲輶列班仙吏齊抗手金支翠蓋空中行  
水簾清冷天闕龍從石留漢策松帶秦封玉女窻開珠箔

捲九枝海日當窗紅驚回清夢竹蕭瑟風馬霓裳盡相失  
花陰地上綠如雲蟾影衣間涼似雪翡翠盤鵲驚厄封禪  
頌梁父詞醉後臥遊真絕奇具堪濟勝不早決待出霞表  
知何時看畫題詩還自計詰旦齋糧從此逝我本三山采  
藥人試把芙蓉謁青帝

暮冬雜詠十首

冷月

蟾吐寒芒出深更月漸升鋪成三徑雪飛到一輪冰客少  
廊腰望霜應鴈背凝羅帷褰又下風利似生棱

晚風

蕭蕭復獵獵暝色助悲風荒磧茅生白斜陽樹不紅排開

纔掩戶驚起乍栖鴻怪底黃昏易同雲滿太空

臘雪

瓊樓霏瑟瑟九地絕纖塵早兆豐年瑞全銷陋巷貧物俱  
無此潔春已欲更新朗照神同澈遙懷玉府人

曉霜

聲發風初定霜華積漸繁角聲酸古戍人迹冷荒村肅殺  
化機伏嚴凝生意存草堂親卷幔清晝有餘溫

凍筆

高齋風栗烈毛穎忽拘攣不意成飛白無心更守元中書  
疑老矣副墨笑茫然儻假呵噓力才原足挾天

煖硯

竹鑪溫凍硯著手亦成春不異燒田種真爲鍊石人薰陶  
資虎僕變理待龍賓應笑冬烘客揮豪自有神

### 火鍋

居然邀鼎食無事宰夫脲水火爭方急鹽梅調自宜冷憐  
工部炙熱異伯鸞炊儻舉銷寒會涼醅亦不辭

### 冰蘊

御冬饒旨蓄不羨五侯鯖豈僅鹹酸異全令肺腑清冷淘  
堪並進寒具好同呈風味應嘗慣真看肉食輕

### 竹鑪

亦名  
火籠

編竹如籠撿中心置瓦盤火宜煨梢柶春永在檀欒並可  
供茶具真能保歲寒此君時送煖何畏雪漫漫

盆梅

疎枝憑束縛人巧失天真  
小閣添清供殘年逗早春  
月流窗隙影雪橫夢中因  
素几凝香處冰壺伴此身

嘉定門人錢坫編校

靈巖山人詩集卷四